

BAB 16: AKIKAH

Akikah dan Marhaban

Akikah boleh didefinisikan sebagai penyembelihan binatang ternakan sempena kelahiran bayi sebagai tanda kesyukuran kepada Allah S.W.T.. Ini bertepatan dengan sabda Rasulullah S.A.W. yang bermaksud:

“Setiap bayi itu tergadai dengan akikahnya. Disembelih untuknya pada hari ketujuh dan dicukur rambutnya serta diberikan nama padanya”.

Hukum melakukan akikah adalah sunat muakkad ke atas ibu bapa atau penjaga kanak-kanak tersebut dan wajib sekiranya seseorang itu bernazar. Waktu melakukan akikah pula disunatkan pada hari ketujuh selepas kelahiran bayi. Akikah harus dilakukan pada bila-bila masa hingga kanak-kanak itu baligh.

Marhaban pula selalunya dilakukan bersempena dengan kenduri akikah bagi bayi yang baru lahir. Marhaban ialah pujian kepada Nabi Muhammad S.A.W. dan dinyanyikan dalam bahasa Arab. Marhaban termasuk dalam nyanyian keagamaan selain nasyid dan qasidah.

Perkara-perkara sunat ketika berakikah:

1. Mencukur rambut bayi yang baru dilahirkan.
2. Menamakan bayi dengan nama yang baik-baik.
3. Memasak daging akikah dengan masakan yang manis.
4. Memuji nama Allah dan berselawat.



